

Izrael postavlja proturaketni sistem

20 februar 2012 Izmijenjeno 07:51 CET

Glasnogovornik vojske kaže da je postavljanje proturaketnog sistema u području Tel Aviva dio godišnje vježbe



Iron Dome je prošle godine uspješno presreo raketu tipa grad ispaljenu na izraelski teritorij [EPA]

Izraelska vojska će u ponedjeljak postaviti proturaketni sustav Iron Dome na području Tel Aviva, izjavio je vojni glasnogovornik. "Iron Dome je u fazi integriranja u oružane snage. U sklopu tog procesa sistem ćemo postaviti na razna područja a među njima je i Tel Aviv", saopćio je glasnogovornik uz napomenu da će raspoređivanje trajati nekoliko dana a početak će od ponedjeljka. Sistem Iron Dome osmišljen je za presretanje manjih projektila kao što su rakete koje palestinski borci ispaljuju iz Pojasa Gaze ili pripadnici Hezbollaha iz Libanona. U martu 2011. je taj sistem postavljen pokraj Pojasa Gaze a 7. marta je uspješno presreo raketu tipa grad ispaljenu na izraelski teritorij.

Britansko upozorenje

Istovremeno, britanski šef diplomatije William Hague upozorio je Izrael da ne bi bilo mudro napasti iranska nuklearna postrojenja, već treba pružiti šansu diplomatiji. "Mislim da u ovom trenutku nije pametno da Izrael pokrene vojnu operaciju protiv Irana.



Glavni inspektor IAEA Nackaerts ponovo u Iranu [Reuters]

Smatram da bi Izrael, kao i čitav svijet, trebao pružiti pravu šansu ozbiljnim ekonomskim sankcijama i diplomatskom pritisku, kao i spremnosti za pregovore sa Iranom, pristupu koji smo mi usvojili", rekao je Hague u nedjelju, prenosi Tanjug.

Prethodnih nedjelja su se pojavile spekulacije da Izrael priprema preventivni napad na iranska nuklearna postrojenja, ali Izrael je to demantirao. Hague je kazao da Izrael Britaniji nije ništa rekao o takvim planovima. "Mi ne učestvujemo u planiranju napada na Iran. Mi ne isključujemo nijednu opciju, ali naš pristup je 100 posto diplomatski i ekonomski usmjeren na uspješno dovođenje Irana za pregovarački sto", objasnio je Hague, prenosi AFP.

Nastavak pregovora

Iran je prošle nedjelje objavio da je spreman za nastavak pregovora o iranskom nuklearnom programu, što su SAD i EU oprezno pozdravile.

Visoka delegacija Međunarodne agencije za atomsku energiju (IAEA) otputovala je u nedjelju večer iz Beča u Iran gdje će tokom dva dana pokušati doprinijeti rješavanju problema oko nuklearnog programa Teherana, za koji Zapad tvrdi da ima za cilj izradu nuklearnog naoružanja.

Delegaciju IAEA predvodi glavni inspektor Herman Nackaerts, koji je i krajem prošlog mjeseca boravio u Iranu.

Izvor: Al Jazeera